

Inatsisartut aalajangiiffigisassaattut siunnersuutigineqarpoq Naalakkersuisut peqquneqassasut Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. november 2010-meersumi § 3, imm. 2 naapertorlugu kingusinnerpaa-mik 2017-imi, Naalakkersuisut tarnip pissusaanik ilisimasallit peqqinnissaqarfiup ilua-ni, pisortat oqartussaasuini allani namminersortunilu ilinniakkaminnut tunngasutigut sulinerat pillugu malittarisassanik erseqqinnerusunik aalajangersaanissaat.

(Steen Lyngø, Atassut)

Akissuteqaat

(Peqqissutsimut Naalakkersuisoq Doris Jakobsen)

1. Siullermeerinnineq

Naalakkersuisut siunnersuummut qujapput.

Naalakkersuisut nappaatinik katsorsaasarnermut atatillugu inatsisitigut isumannaatsuunissaq annertuumik soqutigisaraat. Pingaaruteqarluinnarpoq innuttaasut tarnip pissusaanik ilisimasalimmit ernumma-teqaratik katsorsartissinnaanissaat, pineqartup peqqinnissaqarfimmi sulisuunera namminersortuunera-luunniit apeqqutaatinnagit.

Tarnip pissusaanik ilisimasallit sulinerata malittarisassaqtitaanissaanik isuma nutaajungilaq. 2009-mi ukiakkut ataatsimiinnermi tarnip pissusaanik ilisimasallit pillugit inatsimmik suliaqartoqarnissaanik siunnersuuteqartoqarpoq, taaguutip illersugaanera, taamatut sulinissamut akuersissuteqartoqartale-nissaa aamma tarnip pissusaanik ilisimasallit piginnaatitaaffii pisussaaffiilu pillugit malittarisassanik ima-qartussamik. Siunnersuut itigartinneqarpoq, aalajangiisoqarmammi Kalaallit Nunaanni Tarnip Pissu-saanik Ilisimasalinnut taamatut sulinissamut akuersissuteqartarneq pillugu inatsiseqalernissaanut pe-riarfissat pillugit nassuiaammik suliaqartoqaqqaassasoq.

Nassuiaammi kaammattuutigineqarpoq piginnaatitsissuteqalissasoq Naalakkersuisut tarnip pissusaanik ilisimasallit sulinerat pillugu malittarisassanik aalajangersaasinnaangorlugit. Taanna maannakkut peqqinnissaqarfiup aqunneqarnera, aaqqissuussaanera taamatullu peqqinnissaqarfimmi sulisut aamma tarnip pissusaanik ilisimasallit pillugit Inatsisartut inatsisaanniippoq.

Naalakkersuisut tamatum kingornatigut tarnip pissusaanik ilisimasallit pillugit nalunaarutissaq sulia-ralugu aallartinnikuuaat.

Nalunaarutissap suliarineqarnera arlalinnik unammilligassartaqarpoq, pingaartumik nakkutilliisutut oqartussaasussat naammagittaalliorsinnaanissarlu pillugit apeqqummut tunngatillugu.

Nunatta Nakorsaaneqarfia peqqissaanermik suliassat suliarineqarnerannik, peqqinnissaqarfimmi inun-nit suliarineqartartunik, ullumikkut nakuutilliisuvoq. Nunatta Nakorsaaneqarfia tarnip pissusaanik ili-simasalinnik peqqissaalluni suliassanik suliaqartanngitsunik naammagittaalliuutit suliarinissaannut taakkulu nakkutiginnissaannut, taamatutaaq immikkut suliassanik ilisimasalinnut ikiuunnissaminut, pisariaqartinneqartutut periarfissaqanngimmat, nakkutilliisutut oqartussaasunik

naammagittaalliorfiusinnaasumillu nassaartoqartariaqarpoq peqqinnissaqarfiup avataani tarnip pissusaanik ilisimasallit pillugit aalajangiisarsinnaasumik.

Naalackersuisut tarnip pissusaanik ilisimasallit pillugit nalunaarutissap suliarineqarnera pimoorutileriniarpaat, sulissutiginiarlugulu tarnip pissusaanik ilisimasallit pillugit nalunaarutissap 2017-imi piareersimanissaa.

Siuliinisut oqaaseqarlutik Naalackersuisut inassutigissavaat siunnersuutip akuerineqarnissaa.